



Adresa: **Ul. Hamdije Čemerlića 39.**  
71000 Sarajevo  
<http://www.voda.ba>

tel. +387 33 726--410  
fax. +387 33 726-414  
e – mail: [info@voda.ba](mailto:info@voda.ba)

Broj: **UP-I/25-3-40-015-3/21**  
Datum: **26.03.2021. godine**

«Agencija za vodno područje rijeke Save» Sarajevo rješavajući po zahtjevu pravnog lica J.P. Međunarodni aerodrom „Sarajevo” d.o.o. Sarajevo, za donošenje rješenja o vodnoj dozvoli za ispuštanje oborinskih onečišćenih voda sa lokacije izgrađenog kompleksa aerodroma Sarajevo sa pratećim sadržajima u ulici Kurta Schorka 36, općina Ilidža, na osnovu člana 109. stav (1) Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 49/99), donosi:

### **RJEŠENJE o vodnoj dozvoli**

1. Pravnom licu J.P. Međunarodni aerodrom „Sarajevo” d.o.o. Sarajevo, daje se vodna dozvola za ispuštanje oborinskih onečišćenih voda sa lokacije izgrađenog kompleksa aerodroma Sarajevo sa pratećim sadržajima u ulici Kurta Schorka 36, općina Ilidža.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola, od strane drugih nadležnih organa, a sve u skladu sa važećim zakonskim propisima, odlukama i dr.
3. Vodna dozvola se daje na osnovu činjeničnog stanja utvrđenog pregledom dostavljene dokumentacije i izvršenim uviđajem na objektu, pod slijedećim uslovima:
  - 3.1. Da pravno lice J.P. Međunarodni aerodrom „Sarajevo” d.o.o. Sarajevo, obezbijedi da se sistem za prikupljanje, prečišćavanje i ispuštanje otpadnih voda kao i objekti izgrađeni u krugu aerodroma Sarajevo sa pratećim sadržajima, održavaju u funkcionalnom stanju i koriste u skladu sa namjenom i uslovima iz ove vodne dozvole.
  - 3.2. Da se u roku od tri godine od izdavanja ovog rješenja završe aktivnosti (pribavljanje odobrenja iz oblasti građenja uključujući i odgovarajuće vodne akte, izvrši izgradnja benzinske pumpe-terminala goriva na novom lokalitetu) te da se postojeća benzinska stanica ukloni sa predmetne lokacije, a sve s cilju zaštite kvantitativno-kvalitativnih karakteristika akvifera podzemnih voda „sarajevskog polja”, koja se koristi za javno vodosnabdijevanje, jer sa aspekta zaštite podzemnih voda u „Sarajevkom polju” jednodlašni rezervoari za gorivo koji su sada postavljeni u sklopu predmetne pumpe ne zadovoljavaju zaštitu podzemnih voda.
  - 3.3. Da se do izmještanja benzinske stanice – terminala goriva, skladištenje nafte i naftnih derivata vrši u podzemnim jednodlašnim rezervoarima, ukupne zapremine 340 tona (3x100 tona avio goriva i 1x40 tona dizel goriva).
  - 3.4. Da se redovno vrši ispitivanje ispravnosti i propusnosti rezervoara za skladištenje goriva u skladu sa propisima iz ove oblasti. U slučaju da se utvrdi propusnost rezervoara isti staviti odmah van funkcije.
  - 3.5. Čišćenje separatora i pratećih elemenata, te odvoz i konačno zbrinjavanje otpadnog mulja i taloga, kao i opasnog otpada sa lokacije predmetnog poslovnog objekta - aerodroma može vršiti isključivo firma ovlaštena za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja separatora ulja i masti, neophodno je voditi službenu evidenciju i arhivu.
  - 3.6. U toku važenja ovog Rješenja, korisnik predmetnih objekata je obavezan poduzeti sve potrebne mjere kako bi kvalitet tehnoloških otpadnih voda, a prije ispuštanja u recipijent, zadovoljio granične vrijednosti u skladu sa članom 14. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj: 26/20 i 96/20).

- 3.7. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa članom 19. stav (4) Uredbe o uslovima ispuštanja otpadnih voda u okoliš i sisteme javne. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji.
- 3.8. Sadržaj (mulj) iz uređaja za prečišćavanje otpadnih voda i ostali otpad ne smije se odlagati na česticu «vodno dobro», odnosno u vodotoke i na njegove obale.
- 3.9. Na predmetnoj lokaciji nije dozvoljeno indirektno ispuštanje otpadnih voda u podzemne vode.
- 3.10. Da se u skladu sa propisima iz oblasti zaštite okoliša vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
- 3.11. Osigurati priručna sredstva za brzu intervenciju u slučaju nekontrolisanog istjecanja naftnih derivata, kako bi se spriječilo moguće onečišćenje voda i tla (piljevina, prikladni apsorbenzi, odgovarajuće posude, uređaji za pretakanje i sl.).
- 3.12. Investitor je obavezan pridržavati se svih mjera i uslova propisanih u saglasnostima i dozvolama, izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Na osnovu utvrđenog stepena zagađenja ispuštenih otpadnih voda izraženog preko broja EBS-a, (ispitivanje urađeno od strane ovlaštene laboratorije) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada, Poglavlje IV, („Službene novine Federacije BiH“, broj 92/07, 46/09, 79/11, 88/12 i 03/16), korisnik je obavezan za utvrđeni broj EBS-a prema rezultatima ispitivanja plaćati posebnu vodnu naknadu za zaštitu voda.
5. U periodu važenja ove dozvole, Korisnik je dužan provoditi sve mjere i aktivnosti propisane istom.
6. Ukoliko radom predmetnog objekta dođe do šteta ma kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
7. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
8. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima napredmetnoj lokaciji obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
9. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
10. Ova vodna dozvola, shodno članu 117. stav (1) Zakona o vodama se daje sa rokom važenja od 5 (pet) godina od dana pravosnažnosti ovog rješenja uz uslov da se realizacija aktivnosti obuhvaćene tačkom 3. dispozitiva rješenja u cjelosti poštuje.
11. Prije isteka važnosti ove dozvole, Investitor je dužan da podnese zahtjev za izdavanje nove vodne dozvole.
12. Ova vodna dozvola može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev.

### **O b r a z l o ž e n j e**

Pravno lice J.P. Međunarodni aerodrom „Sarajevo“ d.o.o. Sarajevo, zahtjevom od 13.01.2021 godine se obratilo ovoj Agenciji za donošenje rješenja o vodnoj dozvoli za ispuštanje oborinskih onečišćenih voda sa lokacije izgrađenog kompleksa aerodroma Sarajevo sa pratećim sadržajima u ulici Kurta Schorka 36, općina Ilidža.

U provedenom postupku dostavljena je i pregledana sljedeća dokumentacija:

A. Opšta dokumentacija

- Aktuelni izvod iz sudskog registra broj: 065-0-RegZ-20-010003 od 22.12.2020. godine, izdat od strane Osnovnog suda u Sarajevo,
- Ovjerena kopija Uvjerenja o poreskoj registraciji, od 22.03.2006.godine, izdatog od strane Porezna uprava-Kantonalni ured Sarajevo,
- Ovjerena kopija Uvjerenja o registraciji/upisu u Jedinstveni registar obveznika neizravnih poreza broj: 04/1-UPJR/1-6096-2/15 od 14.10.2015. godine, izdatog od strane Uprave za indirektno-neizravno oporezivanje Banja Luka.
- Kopija uplatnice administrativne takse,
- Kopija rješenja o okolinskoj dozvoli broj: UPI 05/2-23-11-104/15 od 23.03.2016. godine izdato od strane Federalnog ministarstva okoliša i turizma,
- Kopija Rješenja o vodnoj dozvoli br. UP-I/25-3-40-742-3/15 od 15.03.2016. godine izdato od strane «Agencija za vodno područje rijeke Save» Sarajevo,
- Monitoring plan za zaštitu okoline za 2020 godinu Međunarodnog aerodroma „Sarajevo“ broj: 10-10-5-1022-0/20,
- Izvještaj o monitoringu kvalitetu i kvantitetu otpadnih voda Međunarodnog aerodroma „Sarajevo“ broj: 1273/20, oktobar 2020. godina urađen od strane „Inspekt-RGH“ d.o.o. Sarajevo,
- Pravilnik o održavanju, korištenju i osmatranju vodnih objekata J.P. Međunarodni aerodrom „Sarajevo“ d.o.o. Sarajevo,
- Izvještaj o provedbi uslova iz rješenja o vodnoj dozvoli UP-I/25-3-40-742-3/15 od 15.03.2016. godine,
- Ugovor o održavanju kanizacionog sistema broj: 02-1-04-7-726-18/20 od 08.04.2020 godine zaključen sa ovlaštenom firmom „AIDA-COMMERCE“ d.o.o. Sarajevo,
- Potvrda o plaćanju PVN-a,
- Projektni zadatak za izradu dokumentacije za izgradnju benzinske stanice,
- Dokumentacija (Rješenje o upotrebi objekata i kolektora oborinskih voda, uvjerenje o položaju objekata u odnosu na vodozaštitnu zonu „Sarajevsko polje“, saglasnost za priključak na kolektor) se nalazi u spisu UP-I/25-3-40-742-1/15.

B. Tehnička dokumentacija

- Projekat izvedenog stanja i prijedlog novog projektovanog rješenja prikupljanja, tretmana i ispuštanja otpadnih voda iz objekta aerodroma koji je izradio „Zavod za vodoprivredu“ d.d. Sarajevo, maj 2015. godine-kopija,
- Glavni projekat novog primarnog kolektora brza izlazna rulnica (D), zaobilazna izlazna rulnica (E), i novi drenažni sistem na MAS urađen od strane „IPSA INSTITUT“ d.o.o. Sarajevo, novembar 2010. godine-uvid prilikom uviđaja,
- Projekat izvedenog stanja atmosferske kanalizacije i fekalne kanalizacije urađen od strane GEOBIRO d.o.o. Konjic-CD.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari i u skladu sa članom 12. stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH», br. 31/15, 55/19 i 41/20), izvršen je obilazak predmetne lokacije i tom prilikom sačinjen zapisnik o uviđaju broj: UP-I/25-3-40-015-2/21 od 19.03.2021. godine.

Uvidom u dostavljenu dokumentaciju i izvršenim uviđajem na licu mjesta može se konstatovati sljedeće:

Međunarodni aerodrom „Sarajevo“ sa pratećim sadržajima se nalazi pored magistralnog puta M-18 Sarajevo-Trnovo u ulici Kurta Schorka 20, općina Ilidža.

Prema Odluci o zaštiti izvorišta za piće u Sarajevskom polju, Međunarodni aerodrom „Sarajevo“ i benzinska pumpa se nalazi u III vodozaštitnoj zoni.

Na predmetnoj lokaciji nalaze se sljedeće cjeline: zgrada putničkog terminala, kontejnerski kompleks Granične policije BiH, pista sa rulnim stazama i pristupnim platformama, tehnički objekat, centar kontrole zračnog prometa, benzinska stanica, kotlovnica, radionica za elektro održavanje, vatrogasna zgrada, radionica za održavanje aerodromske opreme i dr.

Snabdijevanje izgrađenog kompleksa aerodroma Sarajevo, vodom za piće, se vrši priključkom na javni vodovodni sistem kojim upravlja KJKP „Vodovod i kanalizacija“ d.o.o. Sarajevo.

Oborinske onečišćene vode sa saobraćajnih površina aerodroma (pista, stajanka i dio rulnice) se putem slivničkih sklopova i sekundarnih kišnih kolektora prikupljaju ka primarnom kolektoru, i odvođe na separator ulja i masti kapaciteta 125 l/s, sa koalescentnim filterom. Prečišćena voda se preko okna za monitoring ispušta u rijeku Željeznicu.

Oborinske onečišćene vode sa tri parkinga i pripadajućih saobraćajnica se putem slivne rešetke, sistema slivnika i kanizacionih cijevi odvođe u tri separatora ulja i masti sa koalescentnim filterima, kapaciteta dva po 40 l/s i jedan 30 l/s. Prečišćena voda se preko revizionih okana ispušta u gradski kanizacioni sistem-zacijevljeni kanal magistralne saobraćajnice, položenim uz ogradu aerodroma prema Kasindolskoj ulici i dalje u rijeku Dobrinju.

Benzinska stanica sa pratećim sadržajima (Terminal za snabdijevanje avio kompanija gorivom) se nalazi u sklopu aerodroma Sarajevo a korisnik iste je „Energopetrol“ d.d. Sarajevo. U sklopu benzinske stanice nalaze se sljedeći sadržaji: administrativne prostorije sa sanitarnim čvorom, jednoplašni podzemni rezervoari, kontejnera za čuvanje uzoraka goriva, separator ulja masti, pretakalište sa razvodnom cjevnom instalacijom, kontejner za otpadna ulja i masti.

Oborinska onečišćena voda sa asfaltnih i betonskih površina benzinske stanice se putem kanala sa rešetkom i uličnim slivnicima odvodi do separatora ulja, masti i naftnih derivata sa koalescentnim filterom a potom u upojni bunar.

Skladištenje kerozina se vrši u podzemnim jednoplašnim čeličnim rezervoarima, ukupne zapremine 300 tona ( 3x100 tona), a dizel gorivo u rezervoarima 1x40 tona.

Podnosilac zahtjeva je u svom izjašnjenju dostavljenom uz zahtjev za izdavanje Rješenja o vodnoj dozvoli obrazložio razloge zbog kojih obaveze iz tačke 3.2. navedenog Rješenja o vodnoj dozvoli nisu završene u ostavljenom roku a to je da je bio otežan postupak Ekspropijacije zemljišta na kojem se planira izgradnja benzinske stanice i isti je završen tek u junu 2019 godine. Takođe je navedeno da usljed mjera koje su poduzete a uzrokovane virusom Covid-19 uslijediti težak period za aerodrom Sarajevo u pogledu prihoda.

U izjašnjenju je navedeno da se za izvršenje aktivnosti izmještanja benzinske stanice traži produženje roka minimalno 3 godine te je tačka 3.2. ovog rješenja data u skladu sa navedenim.

Po izjavi podnosioca zahtjeva u proteklom periodu izvršene su sljedeće aktivnosti a vezane za obaveze iz tačke 3.2. Rješenja o vodnoj dozvoli:

Riješeni su imovinsko-pravni odnosi za lokaciju na kojoj se planira izgradnja terminala za goriva za MAS. Lokacija novog terminala nalazi se na istočnom kraju kompleksa aerodroma. Nova lokacija se nalazi u blizini vanjske ceste čime će biti olakšano snabdijevanje goriva.

U toku su aktivnosti izrade projektne dokumentacije neophodne za pribavljanje dozvola za izgradnju novog terminala za avio gorivo.

Podnosilac zahtjeva vrši redovno ispitivanja kvaliteta oborinskih onečišćenih voda od strane ovlaštene laboratorije (na ispustu u rijeku Željeznicu, sa lokacije benzinske pumpe prije ispusta u upojni bunar i nakon tretmana na tri postojeća separatora na parking prostoru a prije ispuštanja u odvodni kolektor prema rijeci Dobrinju), uzorci iz okna za monitoring, čiji su rezultati u skladu sa dozvoljenim vrijednostima propisanih Uredbom.

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta na stanje voda i vodni režim, podnosiocu zahtjeva su ovom vodnom dozvolom u tački 3. dispozitiva Rješenja propisani uslovi u skladu sa odredbama članova 53. i 116. Zakona o vodama, člana 12. i 13. Pravilnika o sadržaju, obliku, uvjetima načinu izdavanja i čuvanja vodnih akata i odredbama člana 3. tačka s) i članova 14., 19. i 20. Uredbe o uslovima ispuštanja otpadnih voda u okoliš i sisteme javne kanalizacije.

Tačka 4. dispozitiva rješenja je propisana u skladu sa Poglavljem III tačke 12. i 29. do 33. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07).

Na osnovu provedenog postupka konstatuje se da je podnosilac zahtjeva, J.P. Međunarodni aerodrom „Sarajevo“ d.o.o. Sarajevo, ispunio minimum uslova za izdavanje vodne dozvole za ispuštanje oborinskih onečišćenih voda te je riješeno kao u dispozitivu ovog rješenja.

Podnosilac zahtjeva je, na ime izdavanja ovog vodnog akta, izvršio uplatu federalne pristojbe iz tar. br. 43. Zakona o federalnim upravnim pristojbama i Tarife federalnih upravnih pristojbi («Službene novine Federacije BiH», br. 6/98, 8/00, 45/10 i 43/13).

**Uputa o pravnom lijeku:**

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta:

Behija Ahmedić, dipl.inž.tehn.

za - **Po ovlaštenju**  
**Rukovodilac sektora za izdavanje**  
**vodnih akata**



*Haris Ališehović*  
**Haris Ališehović, dipl.inž.građ.**

Dostaviti:

- J.P. Međunarodni aerodrom „Sarajevo“ d.o.o. Sarajevo, ul. Kurta Schorka 36, Sarajevo
- ⊖ AVP Sava, ISV-vodna knjiga
- Org.jed. 50
- Org.jed. 40-arhiva
- Oglasna tabla AVP Sava Sarajevo